

Bosna i Hercegovina
Federacija Bosne i
Hercegovine
Kanton Sarajevo
Grad Sarajevo
**OPĆINA CENTAR
SARAJEVO**
Općinski načelnik



Bosnia and Herzegovina
Federation of Bosnia and
Herzegovina
Canton Sarajevo
City of Sarajevo
CENTAR MUNICIPALITY
Municipal Mayor

Босна и Херцеговина
Федерација Босне и
Херцеговине
Кантон Сарајево
Град Сарајево
**ОПШТИНА ЦЕНТАР
САРАЈЕВО**
Општински начелник

Na osnovu člana 15. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, br. 49/06 i 51/09), člana 25. i 69. Statuta Općine Centar Sarajevo-Prečišćeni tekst („Službene novine Kantona Sarajevo“, broj 23/04), Općinski načelnik Općine Centar, donosi

P R A V I L N I K

o dodjeli novčanih podsticaja za sufinansiranje nabavke nove poljoprivredne mehanizacije

I OPĆE ODREDBE

Član 1. (Predmet)

Ovim Pravilnikom se uređuju uslovi i postupak za izbor korisnika novčanih podsticaja za sufinansiranje nabavke nove poljoprivredne mehanizacije licima koji obavljaju obrtničku poljoprivrednu djelatnost i fizičkim licima sa područja Općine Centar Sarajevo.

Član 2. (Namjena korištenja sredstava)

- (1) Finansijska sredstva, u skladu sa ovim Pravilnikom namijenjena su isključivo za nabavku nove mehanizacije, priključnih sredstava i nove opreme u biljnoj i animalnoj proizvodnji.
- (2) Mehanizacija koja je nabavljena na lizing, polovna ili putem komisije prodaje ne može biti osnov za dodjelu finansijskih sredstava u skladu sa ovim Pravilnikom.

II USLOVI I POTREBNA DOKUMENTACIJA ZA OSTVARIVANJE PRAVA UČEŠĆA KANDIDATA U PROJEKTU

Član 3. (Uslovi)

- (1) Pravo na dodjelu novčanih podsticaja za sufinansiranje nabavke nove poljoprivredne mehanizacije mogu ostvariti kandidati pod sljedećim uslovima:
- a) Da su fizička lica sa stalnim prebivalištem na području Općine Centar Sarajevo, upisana u RPG i RK (Registar poljoprivrednih gazdinstava i Registar klijenata) sa izvršenim ažuriranjem u tekućoj godini;
 - b) Da su vlasnici obrta, registrovanog za obavljanje poljoprivredne djelatnosti sa sjedištem na području Općine Centar, upisanih u RPG i RK (Registar poljoprivrednih gazdinstava i Registar klijenata) sa izvršenim ažuriranjem u tekućoj godini;
 - c) Da je kandidat kupio novu poljoprivrednu mehanizaciju u tekućoj godini;
 - d) Da je registrovao mehanizaciju koja podliježe registraciji;
 - e) Da podnosilac zahtjeva ima fakturu i/ili fiskalni račun na ime poljoprivrednika odnosno obrta o kupovini nove poljoprivredne mehanizacije;
 - f) Da podnosilac zahtjeva ima otvoren i aktivan račun u banci;
 - g) Prednost pri dodjeli novčanih podsticaja imaju podnosioci zahtjeva koji do sad nisu ostvarili pravo u Općini Centar na novčani podsticaj za mehanizaciju, priključna sredstva i novu opremu u biljnoj i animalnoj proizvodnji.

Član 4. (Potrebna dokumentacija)

- (1) Kandidat koji želi ostvariti pravo na dodjelu novčanih sredstava dužan je dostaviti dokumentaciju kojom dokazuje ispunjavanje uslova, u originalu ili ovjerenim kopijama:
- a) Zahtjev za dodjelu sredstava (potpisan od podnosioca zahtjeva);
 - b) Račun za nabavku mehanizacije sa dokazom o uplati (obavezna ovjerena kopija fiskalnog računa izdata u tekućoj godini). Ukoliko prodavac ne podliježe fiskalizaciji, na fakturi mora biti upisan broj rješenja nadležne porezne uprave na osnovu kojeg je prodavac oslobođen fiskalizacije;
 - c) Ovjerenu izjavu u općini da će poljoprivrednu mehanizaciju, priključna sredstva i opremu u biljnoj i animalnoj proizvodnji koristiti isključivo poljoprivredno gazdinstvo i da istu neće prodati ili davati u zakup u naredne tri godine od dana ostvarivanja novčanih podsticaja;
 - d) Dokaz o otvorenom i aktivnom računu u banci - Potvrda/obavijest/instrukcije (ne stariji od 6 mjeseci);
 - e) Podnosioci zahtjeva koji imaju registrovanu poljoprivrednu djelatnost, dužni su dostaviti Uvjerenje o izmirenim poreskim obavezama za tekuću godinu.

III FINANSIRANJE PROJEKTA

Član 5. (Nosilac aktivnosti)

- (1) Služba za privredu i poslovne prostore je nosilac aktivnosti vezanih za realizaciju Projekta.
- (2) Sredstva za realizaciju Projekta obezbjeđena su u Budžetu Općine Centar Sarajevo na kodu 615200 kao tekući transfer pojedincima za nabavku poljoprivredne mehanizacije.

- (3) Iznosi novčanih podsticaja za nabavku nove poljoprivredne mehanizacije i pravo na dodjelu istih zavise od visine cijene kupljene mehanizacije kako je navedeno u Javnom pozivu.

IV IZBOR KANDIDATA

Član 6.

(Javni poziv)

- (1) Služba za privredu i poslovne prostore će objaviti Javni poziv za dodjelu novčanih podsticaja za sufinansiranje nabavke nove poljoprivredne mehanizacije na području Općine Centar Sarajevo.
- (2) Javni poziv sadrži: uslove koje kandidat mora ispunjavati, rok za podnošenje prijave i druge potrebne podatke.
- (3) Javni poziv ostaje otvoren 60 (šezdeset) dana od dana objavljivanja Javnog poziva u dnevnom listu, web stranici i oglasnim pločama mjesnih zajednica.
- (4) Odluka o rezultatima Javnog poziva će biti objavljena na web stranici i oglasnoj ploči Općine Centar Sarajevo.

Član 7.

(Odabir kandidata)

- (1) Komisiju imenuje Općinski načelnik.
- (2) Komisija se sastoji od najmanje tri člana iz reda državnih službenika.
- (3) Komisija radi u punom sastavu i za svoj rad je odgovorna Općinskom načelniku.
- (4) Komisija ima zadatak da u skladu sa odredbama ovog Pravilnika i na osnovu propisanih kriterija objavljenih u Javnom pozivu, izvrši vrednovanje dostavljenih prijave, sačini pismeni izvještaj sa utvrđenim prijedlogom raspodjele sredstava i dostavi ga Općinskom načelniku.
- (5) Neblagovremene prijave Komisija neće uzeti u razmatranje o čemu će podnosioc prijave biti obaviješten.
- (6) Komisija zadržava pravo da izvrši uviđaj na terenu u cilju utvrđivanja vjerodostojnosti priložene dokumentacije iz svakog pojedinačnog zahtjeva.
- (7) Na osnovu prijedloga Komisije, Općinski načelnik će donijeti Odluku o dodjeli novčanih podsticaja za kupovinu nove poljoprivredne mehanizacije, te će ista biti objavljena na web stranici i oglasnoj ploči Općine Centar Sarajevo.
- (8) Na osnovu Odluke o dodjeli novčanih podsticaja za kupovinu poljoprivredne mehanizacije poljoprivrednim proizvođačima, koji se bave biljnom i animalnom proizvodnjom, Općinski načelnik će sa odabranim Korisnicima zaključiti Ugovor.
- (9) Raspodjela sredstava vršit će se u skladu sa raspoloživim sredstvima, a najviše do iznosa planiranog Budžetom Općine Centar.

Član 8.

(Pravo prigovora)

Podnosioci zahtjeva koji nisu ostvarili pravo na podsticaj imaju pravo na izjavljivanje prigovora općinskom načelniku u roku od 8 dana od dana objavljivanja Odluke.

V ZAVRŠNE ODREDBE

Član 9.

(Nadzor)

- (1) Realizaciju i nadzor u procesu dodjele i implementacije podsticajnih sredstava u skladu sa odredbama ovog Pravilnika vršiće Općinski načelnik putem Službe za privredu i poslovne prostore.

- (2) Ukoliko se utvrdi da su sredstva nenamjenski dodijeljena Služba će donijeti Rješenje o povratu sredstava.
- (3) U slučaju iz stava (2) ovog člana, kandidat može podnijeti novi zahtjev za ostvarivanje prava na novčani podsticaj ukoliko je ispunio sve uslove propisane ovim Pravilnikom nakon 3 (tri) godine od dana povrata sredstava.

Član 10.

(Prelazne i završne odredbe)

Stupanjem na snagu ovog Pravilnika, prestaje važiti Pravilnik o dodjeli novčanih podsticaja za sufinansiranje nabavke nove poljoprivredne mehanizacije na području Općine Centar Sarajevo broj: 16-20-158/23 od 13.10.2023.godine

Član 11.

(Vremenska važnost Pravilnika)

Pravilnik stupa na snagu danom objave na oglasnoj ploči Općine Centar Sarajevo.

Broj: 16-11-4180/24 Sarajevo, 10.06.2024. godine	OPĆINSKI NAČELNIK _____ Srđan Mandić
---	--